



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEEMPAT
MESYUARAT PERTAMA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Permohonan Pembinaan Pusat Transformasi Luar Bandar (RTC) Mini Dalam Daerah Tangkak**
- *YB. Tuan Tuan Syed Ibrahim bin Syed Noh (Ledang)* (Halaman 1)
- **Masalah Bekalan Benih Padi Sah**
- *YB. Tuan Chan Ming Kai (Alor Setar)* (Halaman 7)

**MALAYSIA
KAMAR KHAS
PARLIMEN KEEMPAT BELAS
PENGKAL KEEMPAT
MESYUARAT PERTAMA**

Isnin, 4 Oktober 2021

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Mohd Rashid Hasnon) **mempengerusikan**
Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Permohonan Pembinaan Pusat Transformasi Luar Bandar
(RTC) Mini Dalam Daerah Tangkak**

2.34 ptg.

Tuan Syed Ibrahim bin Syed Noh [Ledang]: *Assalamualaikum warahmatullahi wabarakatuh*, selamat petang. Tuan Timbalan Yang di-Pertua, Yang Berhormat Timbalan Menteri. Rakyat di Ledang menghadapi kesukaran dalam melaksanakan urusan melibatkan agensi-agensi kerajaan memandangkan ada sesetengah pejabat agensi kerajaan tiada sekitar kawasan Ledang, lebih spesifik dalam daerah Tangkak.

Secara umum, UTC dan RTC ataupun apa-apa jenama yang sewaktu dengannya, berfungsi sebagai pusat setempat yang menyediakan pelbagai perkhidmatan kerajaan dan swasta kepada komuniti bandar dan luar bandar. Urusan pendaftaran dengan kaunter kerajaan, bayaran utiliti, perkhidmatan agensi kerajaan serta perkhidmatan swasta seperti perkhidmatan bank yang boleh dilakukan setempat akan membawa manfaat besar kepada penduduk sekitar UTC atau RTC tersebut.

Sekarang, bagi melaksanakan urusan-urusan ini, penduduk dalam daerah Tangkak terpaksa ke Muar, RTC Sungai Rambai dan Mini RTC Asahan. Perkara ini membawa kesukaran kepada rakyat terutamanya golongan warga emas yang terpaksa menyelesaikan urusan ini dalam kawasan Melaka dan Muar. Dalam kesukaran menghadapi wabak COVID-19 kini, isu ini menjadi lebih membebankan penduduk daerah Tangkak dan warga Ledang.

Bayangkan, Makcik Kiah terpaksa menaiki bas awam dari Kampung Sagil menuju ke Muar bagi menyelesaikan urusan pembaharuan pasport di kaunter imigresen dan urusan haji

di Tabung Haji. Ini akan membebankan beliau kerana terpaksa bergerak ke tempat berbeza dengan kekangan ketiadaan kenderaan.

Tambahan lagi, melihat kepada perkembangan bilangan penduduk dan pertumbuhan sektor ekonomi dalam daerah Tangkak, kewujudan mini RTC dalam daerah Tangkak dilihat perlu. Selain itu, melihat kepada fakta bahawa daerah Tangkak terkenal sebagai hab pertanian dan buah-buahan, saya berpendapat bahawa pembukaan sebuah pejabat pertanian daerah di mini RTC ini sebagai pendekatan yang strategik.

Justeru, saya memohon pihak Kementerian Pembangunan Luar Bandar untuk mempertimbangkan dengan segera membina sebuah Pusat Transformasi Luar Bandar (RTC) Mini bagi memberi kemudahan kepada warga Ledang terutamanya penduduk dalam daerah Tangkak menyelesaikan urusan melibatkan agensi kerajaan dan sesetengah pihak swasta berkaitan.

Rumusannya, keperluan mini RTC dalam daerah Tangkak ini menjadi keperluan mengambil kira keperluan keselamatan dan kebajikan rakyat. Faktor-faktor ini menjadi pemacu utama dalam usaha memastikan cadangan yang sudah bertahun ini menjadi keutamaan dan kenyataan. Sekian, terima kasih.

2.37 ptg.

Timbalan Menteri Pembangunan Luar Bandar II [Datuk Haji Hasbi bin Habibollah]: *Bismillahi Rahmani Rahim. Assalamualaikum warahmatullahi wabarakatuh.* Tuan Yang di-Pertua, Yang Berhormat Ledang.

Untuk makluman Yang Berhormat, kerajaan telah mengumumkan penstrukturan semula dengan izin, *Rural Transformation Center (RTC)* dan *Mini Rural Transformation Center (MRTC)* sebagai Pusat Komuniti Desa (PKD) pada 11 Oktober 2018. Hasil penstrukturan semula tersebut, sebanyak 186 Mini RTC dan lima RTC dikekalkan di bawah kementerian yang kini dikenali sebagai PKD. Ini menjadikan bilangan PKD di seluruh negara sebanyak 191 buah PKD termasuk di Sabah dan Sarawak dengan pertambahan fungsi untuk memberikan perkhidmatan yang lebih baik kepada masyarakat luar bandar setempat agar selari dengan moto PKD iaitu 'Satu Hentian Pelbagai Perkhidmatan'.

Fungsi sedia ada PKD adalah seperti berikut:

- (i) pusat latihan komuniti yang menyediakan latihan kemahiran dan latihan ICT kepada penduduk setempat;
- (ii) pusat aktiviti wanita yang menyediakan program yang mampu mempertingkatkan peranan golongan wanita dalam institusi komuniti luar bandar terutamanya meningkatkan penglibatan dalam sektor ekonomi dan keusahawanan serta kepimpinan;

- (iii) pusat perkhidmatan setempat yang menyediakan perkhidmatan yang diperlukan oleh masyarakat setempat secara kolaborasi bersama agensi kerajaan, swasta, badan bukan kerajaan (NGO), seperti kaunter bergerak Jabatan Pengangkutan Jalan (JPJ), kaunter bergerak Tabung Haji serta perkhidmatan pos bergerak;
- (iv) kesukarelawan dengan mengadakan program, aktiviti kesukarelawan dengan penglibatan masyarakat setempat seperti tuisyen percuma, taklimat kesedaran dan aktiviti gotong-royong; dan
- (v) pusat pengumpulan produk usahawan desa iaitu sebagai hab pengumpulan dan promosi produk usahawan desa.

Taburan 24 buah PKD di negeri Johor adalah seperti berikut:

Bil	Pusat Komuniti Desa	Daerah	DUN	Parlimen
1.	Parit Tengah	Batu Pahat	Rengit	Batu Pahat
2.	Mawai Biru	Kota Tinggi	Sedili	Kota Tinggi
3.	FB Sungai Ara	Kota Tinggi	Sedili	Kota Tinggi
4.	Melayu Raya	Pontian	Pekan Nenas	Tanjong Piai
5.	Parit Sapran	Pontian	Pulai Sebatang	Pontian
6.	Perpat Timbul	Pontian	Kukup	Tanjong Piai
7.	Melayu Niyor	Kluang	Paloh	Sembrong
8.	Batu 3 1/2 Paloh	Kluang	Paloh	Sembrong
9.	Air Merah	Mersing	Endau	Mersing
10.	FB Sri Mahkota	Mersing	Endau	Mersing
11.	Pok	Johor Bahru	Nusa Jaya	Iskandar Putri
12.	Murni Jaya	Kulai Jaya	Bukit Permai	Kulai
13.	Parit Bugis	Muar	Sungai Balang	Muar
14.	FB Bukit Kepong	Segamat	Bukit Serampang	Pagoh
15.	Lenga/Batu 28 Lenga	Muar	Bukit Serampang	Pagoh
16.	Batu 18	Muar	Bukit Nanning	Bakri
17.	Panchor/Melayu Panchor	Muar	Jorak	Pagoh
18.	Desa Temu Jodoh	Segamat	Bekok	Labis
19.	Kompleks Penghulu Bukit Kepong	Muar	Bukit Serampang	Pagoh

Bil	Pusat Komuniti Desa	Daerah	DUN	Parlimen
20.	Layang-layang	Kluang	Layang-layang	Simpang Renggam
21.	Tanjung Sedili	Kota Tinggi	Sedili	Kota Tinggi
22.	Bukit Raja	Kota Tinggi	Tanjong Surat	Pengerang
23.	Kahang	Kluang	Kahang	Sembrong
24.	Kulai	Kulai	Kulai	Kulai

Untuk makluman Yang Berhormat, kementerian pada masa ini tiada mempunyai perancangan untuk pertambahan PKD baharu kerana memberi tumpuan kepada pemeraksanaan peranan 191 buah PKD sedia ada, melalui pelaksanaan projek pemeraksanaan PKD di bawah Rancangan Malaysia Kedua Belas (RMKe-12) dengan peruntukan berjumlah RM20 juta.

Pemeraksanaan peranan PKD ini turut merangkumi pertambahan peranan baharu seperti berikut:

- (i) pusat sehenti maklumat perniagaan di mana PKD menjadi platform bagi masyarakat luar bandar mendapatkan maklumat bagaimana untuk memulakan perniagaan;
- (ii) pusat penyebaran maklumat di mana PKD bekerjasama dengan pelbagai pihak termasuk agensi kerajaan, swasta, badan bukan kerajaan (NGO) dan Institut Pengajian Tinggi (IPT);
- (iii) pusat pengumpulan pos dengan kerjasama pihak Pos Malaysia;
- (iv) pusat pengumpulan sisa domestik di mana premis PKD dijadikan tempat untuk menyampaikan taklimat kesedaran terhadap pengurusan sisa serta program kitar semula; dan
- (v) ekonomi digital dengan menyediakan kaedah alternatif bagi masyarakat luar bandar bagi pembayaran tanpa tunai melalui *e-wallet* atau *e-payment*.

Untuk makluman Yang Berhormat juga, walaupun KPLB tidak mempunyai perancangan bagi menambah bilangan PKD baharu dalam masa terdekat ini, namun KPLB sedia mengkaji keperluan untuk membina PKD baharu pada masa hadapan bergantung kepada kedudukan semasa kewangan negara. Oleh yang demikian, penduduk daerah Tangkak dialu-alukan untuk mendapatkan perkhidmatan yang disediakan dengan berkunjung ke PKD berdekatan seperti PKD FB Bukit Kepong, PKD Kompleks Penghulu Bukit Kepong,

PKD Melayu Panchor dan PKD Lenga di mana jarak perjalanan adalah di antara 30 minit dan sejam.

Orang ramai boleh mendapatkan maklumat mengenai lokasi atau berhubung terus dengan Pengurus PKD melalui portal rasmi kementerian di URL seperti berikut <https://www.rurallink.gov.my/direktori-pkd/>. Terima kasih.

Masalah Bekalan Benih Padi Sah

2.44 ptg.

Tuan Chan Ming Kai [Alor Setar]: Terima kasih. Tuan Yang di-Pertua, Yang Berhormat Timbalan Menteri Pertanian, saya ingin menarik perhatian pihak kementerian ke atas isu pembekalan benih padi sah. NAFAS dijadikan pemborong tunggal untuk pembekalan benih padi kepada pesawah bermula pada awal tahun ini. Sebelum ini, benih padi dihasilkan oleh sembilan buah syarikat dengan kuota tertentu. Yang Berhormat Tuan Yang di-Pertua, Yang Berhormat Timbalan Menteri Pertanian, saya ingin menarik perhatian pihak kementerian ke atas isu pembekalan benih padi sah.

Untuk makluman Yang Berhormat Menteri, sebelum ini, harga benih padi sah adalah RM28 bagi setiap 20 kilogram di pintu kilang, tetapi selepas pelantikan NAFAS sebagai pemborong tunggal, harga telah naik kepada RM35 setiap kilogram. Walau bagaimanapun, kini telah bertukar kembali ke sistem lama di mana benih padi dibekalkan oleh sebelas buah syarikat tetapi dengan harga pintu kilang RM33 setiap 20 kilogram.

Minta Yang Berhormat Menteri menjelaskan, apakah punca kegagalan NAFAS yang menyebabkan kerajaan tukar kembali ke sistem lama dan mengapa kegagalan tersebut tidak dapat dijangka dan dinilai sebelum NAFAS dilantik sebagai pemborong tunggal pada awal tahun. Minta Yang Berhormat Menteri menjelaskan juga mengapa penukaran kembali kepada sistem lama tersebut tidak diikuti dengan penurunan harga kepada harga asal RM28 tetapi ditetapkan harga RM33. Apakah perincian kos bagi kenaikan RM5 tersebut?

Minta Yang Berhormat Menteri senaraikan maklumat berikut bagi setiap syarikat pembekal benih padi masing-masing:

- (i) kapasiti pengeluaran setiap syarikat;
- (ii) kapasiti penyimpanan setiap syarikat;
- (iii) pemilikan atau penyewaan mesin dan gudang setiap syarikat;
- (iv) jumlah tenaga kerja setiap syarikat;
- (v) kemampuan dan kapasiti *lab* ujian setiap syarikat; dan
- (vi) kuota yang diberi kepada setiap syarikat.

Sekian, terima kasih.

2.46 ptg.

Timbalan Menteri Pertanian dan Industri Makanan I [Datuk Seri Haji Ahmad bin Hamzah]: *Bismillahi Rahmani Rahim. Assalamualaikum warahmatullahi wabarakatuh.* Tuan Yang di-Pertua, Yang Berhormat Alor Setar.

Untuk makluman Ahli Yang Berhormat, sebelum 1 Januari 2021, seperti yang telah dijelaskan sebelum ini iaitu melalui jawapan bertulis kepada Pertanyaan Lisan Yang Berhormat, pada 29 September 2021, kerajaan hanya menetapkan harga jualan pengeluaran benih padi sah secara bersubsidi sebanyak RM28 setiap beg 20 kilogram benih padi di pintu kilang sahaja secara tanpa kawalan pembelian.

Dalam hal ini, Kementerian Pertanian dan Industri Makanan mendapati bahawa manipulasi harga benih padi sah oleh ejen-ejen yang tertentu atau orang-orang tengah termasuk tindakan menyorokkan stok setiap kali musim penanaman padi mengakibatkan harga jualan akhir di peringkat pesawah, tidak dapat dikawal dan melonjak sehingga sekitar RM33 hingga ke RM60 setiap beg.

Perkara sedemikian merupakan suatu yang tidak wajar dibenarkan sama sekali. Ini memandangkan Insentif Benih Padi Sah telah diberikan oleh kerajaan. Oleh yang demikian, mulai 1 Januari 2021, MAFI telah mengambil inisiatif untuk melaksanakan satu mekanisme, penetapan harga siling benih padi sah di paras maksimum sebanyak RM35 satu beg, 20 kilogram.

Pendekatan ini bagi mengawal harga di peringkat runcit dan memastikan supaya harga jualan akhir di peringkat pesawah tidak dimanipulasi oleh mana-mana pihak apabila sampai kepada pesawah, sekali gus untuk memastikan kepentingan pesawah terus terpelihara. Maka, dakwaan harga benih padi sah bersubsidi telah naik adalah tidak tepat jika meneliti kepada konteks realiti sebenar di lapangan, kerana penetapan harga siling tersebut. Harga jualan akhir di peringkat pesawah dalam banyak keadaan adalah jauh lebih tinggi dan merugikan pesawah.

Penetapan harga siling diparas maksimum sebanyak RM35 per beg yang telah dibuat adalah sangat munasabah buat masa ini, dengan mengambil kira pelbagai faktor di semua peringkat pengeluaran dan juga pengedaran. Antara faktor yang diambil kira adalah kos-kos bagi belian bekalan benih daripada pesawah dan pengeluar, pembungkusan khas dan pembangunan kod penjejakan (*tracing*), dengan izin, logistik, pengangkutan dan juga penyimpanan seperti kos pengurusan yang berkaitan oleh Pertubuhan Peladang Kawasan (PPK) yang perlu dibiayai oleh Pertubuhan Peladang Kebangsaan (NAFAS).

Memandangkan NAFAS dikehendaki untuk memastikan bekalan benih padi sah tersebut disimpan sebaik-baiknya, sehingga sampai ke peringkat pesawah pada masa yang telah ditetapkan. Pada masa yang sama, NAFAS juga telah diminta untuk menyerap sebarang kos-kos tambahan sekiranya ada bagi melancarkan proses pembekalan.

Jadi, untuk makluman Ahli Yang Berhormat – selanjutnya, apabila MAFI membuat keputusan untuk melibatkan NAFAS dalam pengedaran pembekalan benih padi sah, matlamat utama ialah untuk melicinkan sistem pengedaran benih padi sah untuk suatu tempoh interim bagi memastikan benih padi berkenaan dapat disampaikan kepada pesawah secara lebih cekap pada kos yang munasabah.

Hal yang demikian oleh sebab, saban tahun isu pengedaran dan pembekalan benih padi sah membabitkan pelbagai manipulasi di peringkat rantai bekalan selain daripada isu kualiti benih padi itu sendiri. Penglibatan NAFAS diharap dapat menambah baik pengedaran dan juga pembekalan benih padi sah memandangkan NAFAS sendiri merupakan gabungan induk daripada persatuan peladang termasuk pesawah dan telah mempunyai jaringan (*networking*) yang amat baik dan sistematik di peringkat akar umbi.

Maka, hak pengedaran telah diberikan kepada NAFAS sehingga 30 Jun 2021 bagi memberikan ruang kepada MAFI untuk meneliti dan juga melaksanakan proses penambahbaikan kepada sistem yang sedia ada. Untuk makluman Ahli Yang Berhormat juga, pendekatan yang diambil ini, sehingga kini berjaya mengekang aktiviti manipulasi harga berdasarkan kepada kurangnya laporan aduan yang kita terima. Tindakan tegas juga akan diambil terhadap mana-mana pihak yang cuba memanipulasikan harga benih padi sah di lapangan.

Maka, dakwaan NAFAS gagal sepenuhnya adalah tidak tepat kerana kehadiran NAFAS sebenarnya telah membantu sedikit sebanyak sistem pengedaran benih padi sah pada ketika MAFI memerlukan ruang bagi meneliti dan melaksanakan proses penambahbaikan kepada sistem yang sedia ada ketika itu. Isu kekurangan benih padi yang berlaku ketika itu, sebenarnya antara lain berkait dengan masalah padanan (*mismatch*) antara permintaan benih bagi *variety* tertentu dengan yang tersedia di pasaran.

Walau bagaimanapun, NAFAS dengan kerjasama semua jabatan dan agensi yang terlibat seperti Bahagian Pembangunan Industri Padi, Jabatan Pertanian (DOA), MARDI, IADA, MADA, LPP dan KADA telah menyelaraskan pembekalan dalam tempoh tersebut dengan melaksanakan pemetaan sumber (*mapping*) bekalan, merangka tempoh kesediaan bekalan, jangkaan keperluan dipasarkan dan penyelarasan semula bekalan.

Bagi kawasan-kawasan yang berkurangan bekalan *variety* tertentu, penyelarasan telah dibuat dengan memindahkan bekalan daripada sumber tersedia di kawasan-kawasan lain yang lebih memerlukan. Seterusnya, mulai 1 Julai 2021, sebagai langkah

penambahbaikan berterusan, MAFI telah memperkemaskan lagi sistem perbekalan benih padi sah ini dengan melantik sebanyak 12 buah syarikat sebagai panel pengeluar benih padi sah. Sebanyak 13 buah syarikat, termasuk NAFAS sebagai pemborong benih padi sah melalui pengeluaran lesen borong oleh Ketua Pengarah Kawal Selia Padi. Mulai bulan Julai 2021, musim kedua tahun 2021.

Pendekatan terbaharu ini tidak bermaksud berbalik kepada sistem lama. Akan tetapi, merupakan suatu penambahbaikan dengan melesenkan panel pengeluaran benih juga sebagai pemborong bersama-sama NAFAS bagi memantapkan elemen kawalan dan juga penguatkuasaan.

Sukacita juga saya menekankan, bahawa pelaksanaan pendekatan-pendekatan terbaharu tidak mengubah harga asas jualan benih bersubsidi iaitu sebanyak RM28 setiap beg 20 kilogram di pintu kilang. Namun, sedemikian, dengan pelantikan syarikat pengeluar benih, sebagai pemborong dan juga pengedar yang sebelum ini tidak berlaku, maka terdapat juga kos-kos tambahan yang turut perlu ditanggung oleh mereka.

Jadi, untuk menjawab soalan Yang Berhormat yang keenam, iaitu, berikut adalah merupakan julat kuota benih padi sah mengikut panel pengeluar. Kita ada lapan syarikat swasta:

Panel Pengeluar Syarikat Swasta	Julat Kuota Benih Padi Sah (Metrik Tan)
Pertama Padi (Malaysia) Sdn. Bhd.	2,000-20,000
OBL Maju Sdn. Bhd.	3,000-10,000
Kilang Beras Seri Merbok Sdn. Bhd.	2,000-6,000
Kilang Beras Bagan Serai Sdn. Bhd.	3,000-10,000
Kilang Beras Jelapang Selatan Muar Sdn. Bhd.	2,000-6,000
Padi Pukal Parit 7 (Sekincan) Sdn. Bhd.	2,000-7,000
Dataran Pusaka Sdn. Bhd.	3,000-10,000
Haji Md.Nor Bin Haji Abd.Rahman (M) Sdn. Bhd.	3,000-10,000

Kita ada empat syarikat GLC:

Panel Pengeluar Syarikat GLC	Julat Kuota Benih Padi Sah (Metrik Tan)
(Pertubuhan Peladang Kawasan (PPK) Puteri Saadong	2,000-5,000
Syarikat Perniagaan Peladang MADA Sdn. Bhd.	5,000-13,000
Pertubuhan Peladang Kawasan (PPK) Lahar Bubu	2,000-6,000
FELCRA Plantation Sdn. Bhd.	2,000-6,000

Terima kasih, Tuan Yang di-Pertua.

Timbalan Yang di-Pertua [Dato' Mohd Rashid Hasnon]: Terima kasih, Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Selasa, 5 Oktober 2021. Terima kasih Ahli-ahli Yang Berhormat.

[Kamar Khas ditangguhkan pada pukul 2.57 petang]